



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu : Abril 2012

Edisaun : 17 Abril 2012

JSMP realiza *workshop* konabá kna'ar Parlamentu iha Suco Ililai Sub Distritu Lautem, Distritu Lautem

Judicial System Monitoring Programme (JSMP) liu husi Unidade Programa Observasaun Parlamentu (POP) iha Kinta feira, 12 Abril 2012 liu bá, hala'ó *workshop* no fahe informasaun konabá kna'ar Parlamentu Nasionál nian iha Suco Ililai, Sub Distritu Lautem, Distritu Lautem. Atividadeae ne'e inklui mós distribui publikasaun JSMP nian hanesan buletin no komunikadu imprensa husi POP nian ba comunidade iha suco refere. Partisipantes ne'ebé partisipa iha *workshop* ne'e hamutuk mane 9 (Sia) feto 21 (rua nolu resin ida) totál partisipantes hamutuk 30 (tolu nolu).

Luis de Oliveira Sampaio Direitór JSMP hateten katak, *atividade ne'e nu'udar komitmentu institucional atu kontinua aumenta no kapasita liu tan povu iha área rurál nia koñesementu konabá prosesu lejislativu, atu nune'e sira bele hatene diak liu tan sira nia representante nia servisu iha uma Fukun Parlamentu Nasionál.*

JSMP fiar katak atividade sira hanesan ne'e importante tebes no persiza habelar bei-beik atu bele lori besik informasaun konabá prosesu servisu parlamentár ba iha área rurál sira no papel konstituisional husi orgaun soberania sira seluk, tan dala barak comunidade kontinua konfunde kna'ar husi orgaun soberania sira. Realidade ne'e bele haree husi kampaña elisaun presidencial premeíriu no segunda ronde. Povu barak mak derije sira nia preokupasaun no espetasaun boot liu ba Prezidente durante kampañe no rezultadu elisaun.

Husi atividade *workshop* no fahe informasaun ne'e, comunidade suco Ililai haksolok tebes ho prezensa JSMP, tanbá bele habelar informasaun to'o iha baze. Aleinde ne'e comunidade iha área refere mós aproveita oportuidade ne'e hodi hato'ó sira nia hanoin ka pedidu importante balun ba JSMP hodi nune'é bele hato'ó hela ba Parlamentu Nasionál mak hanesan tuir mai ne'e:

- Husu ba Parlamentu Nasionál atu halakon lei pensaun vitalísia hodi la bele fo benefisiu deit ba eis titulares sira bainhira remata sira nia madatu

- Husu ba membrus Parlamentu Nasionál, atu halo fiskalizaun to'o iha área rurál, hodi haree direktamente povu nia susar no nesesidade.
- Husu ba membrus Parlamentu Nasionál no membru governu sira ne'ebé halo ona promesa atu realiza sira nia promesa ne'e.

Bázeia ba JSMP nia observaun ne'ebé hetan durante atividade fahe informasaun hirak ne'e, comunidade hot-hotu kuaze iha ejijénsia hanesan deit, liu-liu sira husu atau distintos deputadus sira ba hakbesik-aan ba povu iha área rurál hodi rona no haree rasik povu nia moris.

JSMP hein katak, husi rekomendasaun ka ejijénsia ne'ebé partipantes sira hato'ó iha *workshop* no disseminasaun informasaun iha suco Ililai, Distritu Lautem, bele enkoraza diak liu tan distintos deputadus sira, atu halo servisu ne'ebé iha qualidade hodi produz lei ne'ebé refleta duni povu Timór Léste nia moris.

Atu hetan infórmasaun kle'an favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883